



Y Ganolfan  
Dysgu Cymraeg  
Genedlaethol



# Cylchlythyr i diwtoriaid Tymor yr Haf 2020

# Croeso

## Gair gan Efa Gruffudd Jones

### Prif Weithredwr y Ganolfan Dysgu Cymraeg Genedlaethol

“Dim ond diolch enfawr sydd gennyf i bawb sydd wedi addasu mor gyflym i ddefnyddio technoleg dysgu o bell. Diolch i bob tiwtor a darparwr cwrs, am eich ymrwymiad a’ch cefnogaeth i ddysgwyr. Dros yr wythnosau diwethaf, ’dyn ni wedi troi at dulliau dysgu newydd ac wedi cyflwyno adnoddau digidol ychwanegol er mwyn rhoi’r cyfleoedd gorau i oedolion ddysgu ac ymarfer y Gymraeg adref. ’Dyn ni mor falch o allu cefnogi ein dysgwyr ar yr adeg yma – gyda’u dysgu, a hefyd o safbwynt eu lles, gan gynnig normalrwydd a chefnogaeth gymdeithasol. Mae’r sector cyfan wedi ymateb yn wych - gallwn fod yn falch iawn o’r hyn ’dyn ni wedi ei gyflawni gyda’n gilydd. ”

## Neges gan Eluned Morgan

### Gweinidog y Gymraeg a Chysylltiadau Rhyngwladol.

“Mae pob un ohonon ni wedi bod yn aros gartref dros yr wythnosau diwethaf. Dyna’r peth iawn i’w wneud i ddiogelu’r system iechyd ac i achub bywydau. Diolch am wneud.

“Rwy’n gwybod fy hun bod aros gartref yn her. Ac ry’n ni i gyd wedi wynebu heriau dros yr wythnosau diwetha nad ydyn ni erioed wedi eu profi o’r blaen. Mae’r cyfnod diweddar wedi effeithio’n fawr ar y ffordd ry’n ni i gyd yn gweithio ac rwy’n wirioneddol ddiolchgar i chi gyd am symud mor gyflym i newid eich dulliau gwaith - a sicrhau darpariaeth dysgu Cymraeg ar-lein enfawr! Diolch am ymateb i’r her.

“Rwy’n gwybod hefyd eich bod chi wedi gweithio’n galed i addasu cynnwys cyrsiau, ac wedi dod i’r arfer â dulliau gwahanol o ddysgu yn gyflym iawn. Rwy’n deall nad oedd hynny’n beth hawdd. Ond mae’r dystiolaeth yn glir: pwy fyddai wedi meddwl ond ychydig wythnosau’n ôl y byddai cymaint o’r gymuned ddysgu yn mynychu dosbarthiadau ar-lein? Mae’n dangos beth mae modd ei wneud pan fydd gwir raid. Ac rwy’n siŵr y bydd yn talu ar ei ganfed i’r Gymraeg.

“Ac mae hyn i gyd yn fwy na jyst dysgu Cymraeg, er cyn bwysiced yw hynny wrth gwrs. Mae’n gyfnod rhyfedd. Ry’n ni i gyd wedi’n hynysu - ry’n ni i gyd yn gweld eisiau teulu, ffrindiau a chydweithwyr. Mae’r gwersi Cymraeg rydych chi’n eu cynnal yn gyfle gwych i bobl gadw cysylltiad gyda’r byd tu hwnt i’w cartrefi, ac yn gyfle i wneud ffrindiau newydd.

“Mae’r byd Dysgu Cymraeg yn dod â phobl at ei gilydd, a gyda’n gilydd ry’n ni’n well. Diolch am eich holl waith.”

# Cyrsiau cymunedol yn parhau

Mae'r cyrsiau cymunedol, a ddechreuodd fis Medi diwethaf a mis Ionawr eleni, wedi gallu parhau yn ystod y cyfnod ansicr yma a diolch i chi gyd am addasu i ddefnyddio llwyfannau cynadledda o bell, megis Zoom a Skype, i ddysgu eich myfyrwyr. 'Dyn ni'n gwybod cymaint mae eich dysgwyr yn croesawu'r cyfle i barhau i ddysgu a chael eich cwmni chi a'u cyd-fyfyrwyr. Diolch am annog pawb i 'droi lan' bob wythnos yn ôl yr arfer!



# Gwersi byw ar Facebook

Mae miloedd o ddechreuwyr wedi troi at wersi Cymraeg dyddiol, wedi'u ffrydio'n fyw ar [dudalen Facebook](#) y Ganolfan o ddydd Llun i ddydd Gwener am 3.00pm. Mae'r gwersi 10 munud o hyd, sy'n cyflwyno geirfa a phatrymau syml a chyngor ar ynganu, wedi ennyn ymateb positif, gyda dysgwyr o Dubai a'r Ariannin yn ymuno â dysgwyr yng Nghymru i'w gwyllo.

**Cymraeg yn y Cartref**  
Welsh at Home

**Learn Welsh at 3pm  
- Deg am 3pm**

Daily 10-minute Welsh lessons for beginners.  
**Gwersi byw ar gyfer dysgwyr newydd.**

# Cyrsiau newydd ar gyfer y Gwanwyn

Bydd nifer ohonoch chi'n dysgu ar gyrsiau Dysgu Cymraeg newydd i ddechreuwr sy'n dechrau ar 12 Mai. Mae'r cyrsiau 10-wythnos, 30 awr o hyd yn cyfuno dysgu o bell dan arweiniad tiwtor gydag astudiaethau ar-lein annibynnol. Dyma'r tro cyntaf i'r Ganolfan gyflwyno cyrsiau cyfunol cenedlaethol o'r math yma.

Mae'r ymateb i'r cyrsiau hyn wedi bod yn ardderchog, gyda dros 1,000 o ddysgwyr yn cofrestru ar gyfer 80 o ddsbarthiadau newydd.

## Adnoddau ychwanegol

Mae clipiau fideo yn cael eu cynhyrchu ar hyn o bryd, gan diwtoriaid ledled Cymru, i gyd-fynd â'r 1,500 o adnoddau fideo, sain a rhyngweithiol sy'n barod ar gael ar [dysgucymraeg.cymru](http://dysgucymraeg.cymru). Cofiwch hefyd am y [cyrsiau blasu byrion ar-lein](#), sy'n cyflwyno Cymraeg llafar, ac mae cynlluniau ar y gweill i gyflwyno sesiynau 'blasu' ar gyfer rhieni a gofalwyr plant ifanc, a fydd hefyd yn cael eu ffrydio'n fyw ar Facebook.

## Llyfrau newydd i ddysgwyr

Yn dilyn llwyddiant y gyfres gyntaf o nofelau a llyfrau hamdden ar gyfer dysgwyr, '[Cyfres Amdani](#)', bydd mwy o deitlau yn cael eu cyflwyno dros y misoedd nesaf. Mae'r llyfrau, sy wedi'u teilwra ar gyfer gwahanol lefelau'r sector Dysgu Cymraeg, yn ffrwyth prosiect ar y cyd rhwng y Ganolfan a Chyngor Llyfrau Cymru.

## Ar Lafar

Er nad yw'r ŵyl wedi'i chynnal eleni, 'dyn ni wedi casglu deunydd diddorol at ei gilydd gan [Amgueddfa Cymru](#) a [Llyfrgell Genedlaethol Cymru](#). Beth am bori [tudalen Ar Lafar](#) ar ein gwefan i ddysgu mwy am hanes Mina, sy'n dysgu Cymraeg yn y Llyfrgell Genedlaethol, a'r gwaith diddorol y mae hi'n ei wneud gyda hen ffilmiau? Gallwch wyllo fideos gan gwmni Mewn Cymeriad sy'n cyflwyno hanes Hedd Wyn a Mari Jones, a gweld llun buddugol [Carole Gowers](#) o Gaernarfon, enillydd cystadleuaeth ffotograffiaeth Ar Lafar, a gafodd ei beirniadu gan y ffotograffydd Nick Treharne. Mae gyda Nick [arddangosfa](#) yn y Llyfrgell ar hyn o bryd. Mae Anni Llŷn hefyd wedi rhannu gweithdy barddoniaeth ar sianel [YouTube Amgueddfa Cymru](#). Beth am rannu'r adnoddau yma gyda'ch dysgwyr?

# Scott Quinnell yn dysgu Cymraeg

“Mae dysgu Cymraeg wastad wedi bod yn rhywbeth o’n i’n meddwl gwneud, ond fe wnaeth ‘laith ar Daith’ roi’r hwb oedd ei angen arna i,” eglura Scott Quinnell, y cyn chwaraewr rygbi rhyngwladol, sy’n cymryd rhan yn y gyfres adloniant newydd ar S4C.

Mae Scott yn un o bum person enwog sy’n rhan o ‘laith ar Daith’. Mae Carol Vorderman, Ruth Jones, Adrian Chiles a Colin Jackson hefyd yn cymryd rhan. Darllenwch y [cyfweiliad yma](#) gyda Scott ac ewch i [wefan S4C](#) am fwy o wybodaeth am y gyfres.

Mae 'laith ar Daith' yn cael ei darlledu bob nos Sul am 8.00pm ar S4C, gydag ailddarllediad am 10.00pm ar nos Fercher. Cofiwch wyllo!



*Yn y llun mae Scott Quinnell, gyda'i fentor ar y rhaglen, Sarra Elgan.*

# Adnoddau Cymraeg eraill ar-lein

Dyma rai enghreifftiau o'r hyn sydd ar gael drwy gyfrwng y Gymraeg i helpu'ch dysgwyr fwynhau ymarfer yn eu cartrefi:

Mae gwasanaeth Cyw i blant ifanc wedi lansio [ap newydd](#).

Mae adnoddau dysgu ar-lein '[Selog](#)' Mentrau Iaith Cymru yn cynnig amrywiaeth o dasgau i blant o bob oed drwy gyfrwng y Gymraeg.

Mae grŵp Miri Meithrin ar [Facebook](#) yn helpu rhieni â phlant bach gyda syniadau am weithgareddau drwy gyfrwng y Gymraeg.

Beth am gadw'n heini gyda chriw FFIT Cymru ar eu [sianel YouTube](#) neu arlunio gyda'r arlunydd Huw Aaron a'r [Cryw Celf](#)?

Mae [Theatr Genedlaethol Cymru](#) hefyd yn cynnig amrywiaeth o weithgareddau a pherfformiadau ar-lein i chi eu mwynhau. Ewch draw i'w gwefan i weld.